


**Los ntawm Thawj Tswj
Hwm Dieter F. Uchtdorf**
Tus Pab Cuam thib Ob hauv
Thawj Pawg Thawj Tswj Hwm



Tej Koob Hmoov uas Tau hauv lub Tuam Tsev

Kuv tseem nco tau thaum kuv niam txiv coj peb tsev neeg mus rau lub Tuam Tsev Swiss, uas yog thawj thawj lub tuam tsev hauv Yus Lauv Teb Chaws, es coj peb tsev neeg mus ua kev cai sib khi kom thiaj nyob tau ua ke mus ib txhis li. Thaum ntawd, kuv muaj 16 xyoo thiab kuv yog tus tub ntxawg ntawm plaub tug me nyuam. Peb txhos caug rau ntawm lub thaj kom lawv thiaj muab tau peb sib khi ua ke hauv lub ntiaj teb no dhau los ntawm lub hwj chim ntawm lub pov thawj hwj, ua ke nrog txoj lus cog tseg hais tias txoj kev sib khi ua ke no yuav kav mus ib txhiab ib txhis thiab. Kuv yeej yuav nco qab ntsoov lub sij hawm zoo kawg nkaus ntawd.

Thaum kuv tseem yog ib tug me nyuam tub xwb kuv yeej xav tsis thoob li hais tias peb yuav tsum hla ciaj ciam teb chaws kom thiaj li muab tau peb tsev neeg sib khi ua ke. Qhov no ua tau ib lub cim txog tej kab ke hauv lub tuam tsev uas yeej hla tau ciaj ciam teb chaws kom thiaj li nqa tau tej koob hmoov los rau txhua tus neeg uas nyob hauv ntiaj teb. Cov tuam tsev ntawm Yexus Khetos lub Koom Txoos ntawm Tsoom Haiv Neeg Ntseeg hauv Hnub Nyoog Kawg yeej yog ua los rau txhua tus neeg hauv ntiaj teb tiag tiag li, txawm hais tias yog haiv neeg twg, coj tej kab lis kev cai twg, los yog tuaj tog tseev tsim twg.

Cov tuam tsev yeej ua tim khawv tsis tu tsis tseg li hais tias qhov zoo yeej yuav yeej xwb xwb. Thawj Tswj Hwm George Q. Cannon (1827–1901), tus Pab Cuam Thib Ib ntawm Thawj Pawg Thawj Tswj Hwm, muaj ib zaug tau hais tias, “Txhua lub pob zeb uas muab los teeb ua lub hauv paus rau ib lub Tuam Tsev, thiab txhua lub Tuam Tsev uas ua tau tiav lawm . . . yuav ua rau Ntxwng Nyoog lub hwj chim tsis muaj zog zuj zus hauv ntiaj teb, ces yuav ua rau lub hwj chim ntawm Vajtswv thiab tej yam uas zoo li Vajtswv muaj zog heev tuaj.”¹

Txawm hais tias txhua lub tuam tsev yeej pab tau kom muaj ncaj ncees ntau dua hauv lub ntiaj teb, los cov neeg uas mus rau lub tuam tsev thiaj li yuav txais tau cov koob hmoov zoo tshaj plaws xwb. Nyob hauv peb thiaj txais tau kev kaj thiab kev txawj ntse thiab khi lus tseg, uas yog hais tias peb ua tau raws li ntawd tiag, ces thiaj li yuav pab peb los coj tau zoo li cov thwj tim. Tiag tiag, lub tuam tsev qhia peb txog saib lub ntsiab ntawm lub neej no yog dab tsi thiab lub tuam tsev pab taw kev rau peb taug, txawm yog hais txog peb lub neej hauv lub ntiaj teb no los yog peb sab ntsuj plig los yog.

Txawm yog li ntawd, peb tsis yog mus hauv lub tuam tsev rau peb tus kheej nkaus xwb. Txhua lub sij

hawm uas peb nkag mus rau hauv tej tsev dawb ceev no, peb ua peb lub luag hauj lwm rau ntawm txoj kev pab cawm lwm tus neeg dim dawb huv uas muaj rau tag nrho Vajtsv cov me nyuam huv tib si vim yog Leej Txiv Tib Leej Tub txoj Kev Theej Txhoj. Txoj kev pab cawm hauv lub tuam tsev no yog ib yam dawb huv thiab ua pub dawb rau lwm tus neeg thiab yog ib yam uas cia peb cov neeg ntiaj teb no koom ua txoj hauj lwm yam muaj yeeb koob tiag kom ua tau neeg txhiv dim rau saum lub Roob Xi-oos.

Hais rau cov uas mus tsis tau rau hauv lub tuam tsev tam sim no txawm yog vim li cas los, kuv yaum kom nej ua txhua yam raws li nej ua tau kom tau daim ntawv tso cai nkag tuam tsev. Daim ntawv tso cai nkag tuam tsev yog ib lub cim qhia txog peb txoj kev ntseeg thiab kev rau siab los pab tus Tswv. Qhov no yog ib lub cim uas qhia txog peb txoj kev hlub rau tus Tswv, Yexus tau qhia hais tias, “Tus uas lees yuav kuv tej lus qhia, thiab ua raws li, tus ntawd yog tus uas muab siab npuab kuv: Kuv txiv yuav hlub tus uas muab siab npuab kuv. Kuv yuav hlub tus ntawd thiab qhib tus ntawd lub qhov muag kom nws pom kuv” (Yauhas 14:21).

Thaum lub ntiaj teb zoo nkauj zuj zus tuaj vim muab cov tsev dawb ceev uas muab fij tseg rau tus Tswv nyob hauv, kuv thov Vajtsv kom peb rau siab ua li peb ua tau kom rub tau lub ntuj ceeb tsheej los nyob ze me ntsis rau lub ntiaj teb thaum peb ua neej tsim nyog kom muaj ib daim ntawv tso cai nkag tuam tsev thiab siv daim ntawv ntawd. Thaum peb ua li ntawd, ces yeej yuav muaj kev ncaj ncees ntau dua tuaj tsis yog hauv peb lub neej thiab hauv tsev xwb, tab sis yuav muaj rau hauv peb tej koog zej zog thiab thoob plaws ntiaj teb.

LUS CIM

1. George Q. Cannon, nyob hauv “The Logan Temple,” *Millennial Star*, Kaum Ib Hlis Ntuj 12, 1877, 743.

QHIA LOS NTAWM TSAB XOY NO

Cov neeg feem coob yuav kawm tau zoo dua thiab nco qab tej yam no ntev dua thaum koj qhia tej tswv yim siv duab thiab lwm yam uas lawv pom tau, tsis yog hais lus xwb (saib *Teaching, No Greater Call* [1999], 182). Thaum qhia zaj lus no, tej zaum yuav tsum muab

ib daim duab txog lub tuam tsev rau lawv saib. Tom qab nyeem zaj lus no tas, ces sib tham saib yog vim li cas lub tuam tsev thiaj tseem ceeb rau Thawj Tswj Hwm Uchtdorf. Caw cov me nyuam yau hauv tsev neeg kom lawv kos ib daim duab txog lawv tsev neeg nyob ntawm lub tuam tsev.

Teaching, No Greater Call hais tias “Yaum kom cov neeg uas koj qhia cuab ib los sis ob peb lub hom phiaj kom pab lawv ua neej raws li txoj ntsiab cai uas koj nyuam qhuav qhia tas” (159). Xav saib puas tsim nyog nyeem Thawj Tswj Hwm Uchtdorf zaj lus ua ke nrog rau tsev neeg thiab caw kom cov neeg hauv tsev neeg cuab ib lub hom phiaj tseg kom pab tau lawv ua neej tsim nyog los muaj thiab siv tau daim ntawv tso cai nkag tuam tsev.

COV HLUAS

Kev uas Nuam Yaj Pom Tau

Los ntawm Mindy Raye Holmes

Thaum kuv tseem hluas kuv muaj ntau lub cib fim mus ua kev cai raus dej hauv lub Tuam Tsev San Diego California tam cov neeg uas tau tag sim neej lawm. Txawm hais tias txhua zaus thaum kuv mus yeej zoo heev li, los muaj ib zaug uas ua rau kuv yeej nco ntsoov li.

Kuv muaj 16 xyoo, thiab kuv tus niam hluas nyuam qhuav muaj 12 xyoo thiab nov yog thawj thawj zaug uas nws mus ua kev cai raus dej tam cov neeg uas tau tag sim neej lawm. Vim hais tias zaum no yog nws thawj zaug xwb ces, wb txiav txim siab hais tias wb yuav mus taug kev ncig sab nraum zoov ntawm lub tuam tsev tom qab wb ua tiav lawm.

Nyob ib ncig ntawm lub tuam tsev muaj ob peb qho chaw nuam yaj, ces wb txawm taug kev mus rau tod. Vim hais tias lub Tuam Tsev San Diego nyob kiag ib sab ntawm txoj kev loj uas muaj tsheb coob heev, ces thaum yus sawv ntawm qhov chaw nuam yaj ntawd, yus pom tau mus rau hauv txoj kev loj.

Sawv ntawm lub tuam tsev uas nyob siab me ntsis ntawd hnuv ntawd ces ua rau kuv saib kuv lub neej txawv me ntsis lawm. Kuv saib mus rau hauv lub ntiaj teb uas muaj tsheb nrov vij voog mus mus los los, tej taj laj uas muaj neeg coob coob, thiab tej paib tiv

ntawm kev uas muaj neej muab khij muab kos ua dog ua dig tag.

Thaum ntawd thiaj li muaj ib qho kev xav los rau hauv kuv lub siab uas hais tias: “Koj yuav tsis xav koom nrog tej yam zoo li no; kev ua neej tsis yog li no.” Kuv yeej ib txwm kawm tau hais tias lub ntsiab ntawm lub neej no yog npaj rov qab mus nrog peb Leej Txiv Saum Ntuj Ceeb Tsheej nyob thiab koj kom tau zoo li Nws. Kuv yeej paub hais tias kuv tsis toob kas tej yam hauv ntiaj teb no los mus ncav tau lub hom phiaj ntawd.

Kuv tig los ntsia lub tuam tsev uas zoo nkauj heev ntawd, ces kuv zoo siab heev rau qhov kuv paub txog txoj moo zoo thiab qhov kev ua neej tshiab uas txoj moo zoo tau qhia rau kuv. Kuv paub hais tias txawm lub ntiaj teb muaj kev ntxhov siab thiab xwm txheej ntau, los kuv nrhiav tau ib qho chaw siab dua los sawv lawm.

Txij hnuv uas kuv nyob ntawm lub tuam tsev ntawd los kuv cog lus rau kuv Leej Txiv Saum Ntuj Ceeb Tsheej hais tias kuv yuav sawv rau ntawm Nws tog txhua lub sij hawm es tsis sawv rau lub ntiaj teb sab li. Txawm hais tias muaj dab tsi hauv lub ntiaj teb los peb yeej yuav kov yeej yog tias peb ceev tej kev khi lus uas peb tau cog tseg thiab sawv rau tej chaw dawb huv (saib D&C 87:8).

COV ME NYUAM

Ua Kom lub Ntiaj Teb Zoo Nkauj Me Ntsis Tuaj

Thawj Tswj Hwm Uchtdorf tau hais tias thaum ua tau ib lub tuam tsev, ces yuav ua rau Vajtsvub lub hwj chim loj heev tuaj hauv lub ntiaj teb thiab yuav ua rau lub ntiaj teb ua ib qho chaw zoo nkauj dua. Tha xim rau daim duab nram qab no. Nram qab no yog tej koob hmoov zoo heev uas lub tuam tsev muab tau rau cov neeg. Yog tias koj yuav neej tsim nyog mus rau hauv lub tuam tsev ib hnuv twg, ces tej koob hmoov no yuav yog koj li!

Ib qho chaw muaj kev hluv thiab zoo nkauj

Ua kev cai raus dej rau cov neeg uas tsis tau ua kev cai raus dej thaum lawv tseem muaj txoj sia nyob

Ib txoj kev sib yuav uas yuav nyob tau mus ib txhis

Cov me nyuam mus los khi tau rau niam thiab txiv nyob mus ib txhis

Ib qho chaw los kawm txog Leej Txiv Saum Ntuj Ceeb Tsheej thiab Yexus Khetos

Ib lub neej tsim nyog thiab mloog lus



Kev Ntseeg • Tsev Neeg • Kev Pab

Kom Muaj Kev Ntseeg thiab Kev Ncaj Ncees ntawm tus Kheej Ntau Dua

Ua tib zoo kawm tej ntaub ntauv no, thiab raws li qhov tsim nyog, nrog cov viv ncaus uas koj mus xyuas siab tham txog tej no. Siv cov lus nug kom pab ntxiv dag zog rau koj cov viv ncaus thiab kom thiaj nruab tau lub Koom Haum Niam Tsev tej kev coj ua rau hauv koj lub neej.

Los ntawm cov Vaj Lug Kub:

Yaxayas 2:23; D&C 109:22–23; 110:8–10

“Yog Peb lub Luag Hauj Lwm uas Peb Yuav Tsum ua Neej Kom Tsim Nyog Ua tej Kab Ke Hauv lub Tuam Tsev “Tej kev khi lus uas peb tau khi nrog rau tej kab ke uas peb tau txais hauv lub tuam tsev yuav los pab peb mus tau rau ntawm Vajtswv. Tej kev khi lus no tsa peb kom nyob siab me ntsis ntawm peb lub hwj chim thiab qhov uas peb pom tau. Peb muaj tej kev khi lus no kom thiaj qhia tau tias peb yeej muaj siab los txhim tsa lub nceeg vaj. Peb los ua cov neeg khi lus thaum peb los khi lus rau ntawm Vajtswv. Tag nrho cov lus uas tau cog tseg lawm yuav yog peb li yog tias peb muaj siab ntseeg ua raws li tej kev khi lus no. . . .

“Cov poj niam ntawm lub Koom Txoos yuav ua li cas thiaj li yuav tau cov koob hmoov ntawm lub tuam tsev?

“Dhau ntawm Nws cov yaj saub, tus Tswv caw cov uas tseem tsis tau txais cov koob hmoov ntawm lub tuam tsev kom ua txhua yam raws li ua tau kom thiaj li tsim nyog los txais tej koob hmoov. Nws caw cov uas twb tau txais cov koob hmoov no lawm kom rov qab mus ntau li ntau tau kom thiaj rov qab muaj qhov kev

zoo no, kom lawv thiaj li pom zoo dua thiab to taub ntxiv txog Nws txoj hauv kev nyob mus ib txhis.

“Cia peb ua lub neej kom tsim nyog muaj ib daim ntawv tso cai nkag tuam tsev uas zoo siv. Cia peb mus rau hauv lub tuam tsev es muab peb tsev neeg sib khi ua ke nyob mus ib txhis. Cia peb rov qab mus rau hauv lub tuam tsev ntau li ntau tau. Cia peb muab lub cib fim rau peb cov neeg ua tau tag sim neej lawm los txais tej kab ke ntawm txoj kev tsa nto. Cia peb los muaj kev xyiv fab rau txoj kev ntxiv dag zog ntawm sab ntsuj plig thiab kev tshwm sim uas peb tau los thaum peb ib sij mus ib zaug hauv lub tuam tsev. Cia peb muaj siab ntseeg thiab ua raws li thiab ceev tej kev khi lus kom peb thiaj li txais tau tag nrho tej koob hmoov ntawm txoj Kev Theej Txhoj.”¹

Silvia H. Allred, tus pab cuam thib ntawm lub Koom Haum Niam Tsev pawg tuam thawj tswj hwm.

Los ntawm Peb zaj Keeb Kwmm

Thawj Tswj Hwm Gordon B. Hinckley (1910–2008) tau qhia hais tias lub Koom Haum Niam Tsev yog muaj los ntawm cov viv ncaus uas xav teev tiam hauv tej tuam tsev:

“Thaum pib txhim tsa lub tuam tsev hauv Kirtland, cov thawj coj tau hais rau cov poj niam kom

muab lawv tej twj taig zoo nkauj uas yog muab av puab los zom mos mos los xyaw nrog rau cov hmoov pob zeb kom thiaj li siv tau los ua tej pob ntsa ntawm lub tuam tsev, ua li no kom thaum lub hnub thiab lub hli ci tuaj ces thiaj ci ci kom lub tsev thiaj li zoo nkauj.

“Thaum lub sij hawm ntawd, uas tsis tshua muaj nyiaj ntau tab sis muaj kev ntseeg loj heev, cov txiv neej siv dag zog thiab kev paub los mus ua tus Tswv lub tsev. Cov poj niam ua zaub mov zoo raws lawv txawj ua tau rau cov txiv neej noj. Edward W. Tullidge tau qhia hais tias thaum cov poj niam tseem tab tom xaws cov ntaub thaiv rau lub tuam tsev, Yauxej Xamiv, uas saib lawv ua, tau hais li no hais tias, ‘Cov muam, nej mas yeej npaj tau txhua lub sij hawm los ua hauj lwm li. Cov viv ncaus yeej yog cov uas xub los ua thiab rau siab ua txhua yam hauj lwm uas zoo. Maiv Liag twb yog thawj twg uas pom qhov kev sawv rov qab los; ces tam sim no cov viv ncaus twb ho yog cov uas xub ua cov hauj lwm rau sab hauv ntawm lub tuam tsev.’ . . .

“Rov qab muaj ib zaug ntxiv dua hauv Nauvoo thiab, thaum kho lub tuam tsev, ob peb tug poj niam twg yog cov uas los xaws cov tsho rau cov txiv neej uas ua tsev hnav. Twb

yog pheej muaj tej kev sib pab li no ces nees nkaum tus poj niam thiaj li sib sau ua ke rau hnuv Thursday, lub Peb Hli Ntuj hnuv tim 17 xyoo

1842, hauv ib chav tsev uas nyob xab saud ntawm tus Yaj Saub lub taj laj.” Ces lub Koom Haum Niam Tsev Pib lawm lau

LUS CIM

1. Silvia H. Allred, “Holy Temples, Sacred Covenants,” *Liahona*, Kaum Ib Hlis Ntuj 2008, 113, 114.
2. Gordon B. Hinckley, “Ambitious to Do Good,” *Ensign*, Peb Hlis Ntuj 1992, 2.

Peb Yuav Ua Tau Dab tsi?

- 1.** Kuv yuav ua li cas thiaj li pab tau kuv cov viv ncaus npaj thiab mus rau hauv lub tuam tsev?
- 2.** Kuv yuav ua li cas thiaj li coj tau tus yam ntxwv zoo li cov viv ncaus thaum ub uas muaj kev txi es thiaj li txais tau tej koob hmoov ntawm lub tuam tsev?
- 3.** Kuv yuav ua li cas thiaj txais tau tej koob hmoov ntawm lub tuam tsev?

Kom tau ntauv ntawv ntxiv, txuas rau www.reliefsociety.lds.org.